
“МЕҲР-5” ОПЕРАЦИЯСИ ДОИРАСИДА СУРИЯДАН ОЛИБ КЕЛИНГАН ФАРҒОНАЛИКЛАР УЙЛАРИГА ЕТИБ КЕЛИШДИ

Ўзбекистон Республикаси Президенти Шавкат Мирзиёевнинг топшириғи ва бевосита назорати остида амалга оширилган “Меҳр-5” операцияси натижасида Суриядаги уруш нуқталарига бориб қолган ва “Ал-Ҳол” лагерида 3 йилдан кўпроқ вақт давомида ушлаб турилган 24 нафар аёл ва 69 нафар бола жорий йил апрель ойининг охирида Ўзбекистонга қайтарилиб, Тошкент вилоятидаги “Бўстон” санаторийсига жойлаштирилганди.

Ўтган давр мобайнида уларга тиббий, психологик ва ижтимоий ёрдам кўрсатилиб, шунингдек, уларнинг шахсини тасдиқловчи ҳужжатларни расмийлаштириш бўйича зарур ишлар амалга оширилди.

Кеча 4 июнь куни кеч соатларда “Меҳр-5” операцияси доирасида юртимизга қайтган фарғоналик 3 нафар аёл ва 6 нафар бола, доимий яшаш жойларига етиб келишди.

Наманган вилоятининг Поп тумани темир йўл вокзалида уларни вилоят ҳокимининг хотин-қизлар масалалари бўйича маслаҳатчиси – вилоят маҳалла ва оилани қўллаб-қувватлаш бошқармаси бошлиғининг биринчи ўринбосари Тўлқиной Тожиева ҳамда ушбу фуқаролар яшовчи шаҳар ва туманлар ҳокимликлари вакиллари қарши олдилар. Сўнгра ушбу фуқаролар яшаш манзиллар бўйича Фарғона шаҳри, Бешариқ ва Қува туманларига етиб бориб, яқинлари дийдорига қовушдилар.

Энди ушбу фуқароларни ижтимоий мослаштириш, аёлларнинг бандлигини таъминлаш бўйича иш ташкил этилади.

[Бизни ижтимоий тармоқларда кузатинг Facebook,](#)
2021-06-05 10:33:17